
BERNAT D'AURIAC , mayestre de Bezers.

7226.

S'IEU agues tan de saber et de sen
Que saubes far bos motz ab novel so ,
Fort voluntiers fari' una canso ;
Quar re no val sabers qui no'l despen.
Que s'aviatz mil marcs d'aur o d'argen ,
E'ls teniatz rescondutz nueg e dia ,
Ja quel tesours autre pro nous tenria :
Ni sens non es entre las gens prezat
Tro qu'es en faitz o en digz demostratz.

E qui sos digz de bona razo pren
No cal temer que diga si be no ;
Et ieu sai los dire de tal razo
Don dizen ver non puesc dir fallimen.
E sabetz don ? no , mas ieu solamen.
Ni ja negus per quan privatz me sia
Non o sabra : mas pero si s sabria
Quanc non agui plazer ni'n fui privatz ,
Mas sol d'aitan qu'en sui enamoratz.

Aisso'n volgra , ses mal entendemen ,
Ab ma domna jogar en sa maizo
Un joc d'escacs , ses autre companho
Que no s'anes del joc entremeten ,
E qu'ieu l disses un escac sotilmen
En descubert , quar plus bel joc seria.
Pero volgra , quar sa honor volria ,
Que quan fora nostre joc afinatz ,
Qu'ieu remazes del joc vencutz e matz.